

I CONCÔRS DE FILOLOGJCHE – I CORSI ED I CONCORSI STORICI

La Società Filologica Friulana, «ente morale», ur à mandât a dutis lis scuelis un manifest e un bando di concôrs par un tema e di un côrs par insegnanz. Chest tant par dî il lavôr mostro che cheste centrâl de culture furlane, che à salvât il Friûl in momenz ben plui grivis di chesc', a sta fasint. E dut cun chêi cuatri che ur passe la Regjon.

La letare e jè rivade a Treli, e di lì e jè partide viers il Panteon dal Friûl cheste rispueste.

Alla SOCIETÀ FILOLOGICA FRIULANA — Ente immorale — Udine

Nus è rivât il befel dal Côrs par insegnanz e dal Concôrs par un tema su lis contis dai nônos.

O pensi che la «Filologica» a sedi un «ente immorale» parceche e jè taliane ancje su la buste dai concôrs, vadì une bande di talians ch'a doprin i bêz de Regjon (e duncje ancje nestris) e l'innomine di servi il Friûl par finilu di copâ a son di sbitiadis.

E difat:

a) pai insegnanz (côrs): no veis mai vût il coragjo di bàtisi cui vuestris santui par dânus un puest a nô prime dai talians, come ch'a fasin a Bolzan e in Valdoste, là che no àn int massepassude ma e àn i puesc' di lavôr e la culture di par di e no une volte ad an par inceâ.

b) pai nônos (concôrs): no veis mai fat nuje par meti un freno a l'emigrazion e al sotànisin economic, pulitic e culturâl. Ancje vuâtris o doprais la lenghe dai parons e o seis pajâz di lôr. I nônos a puedin dome dî che, cun int come vuâtris, ancje pai nevôz e sarâ compagne. Vuâtris però us sta plui a cûr che i furlans a partissin e a patissin, par podê, dopo, fâ la «racolte» des passions de int.

Par chel, s'ò veis un sclip di cussiense, finîle di doprâ il Friûl e vergognaisi, tacant dal vuestri Pressident che si è indegnât di «astignîsi» su l'Universitât Furlane des 125.000 firmis. Esal chest il Friûl ch'ò smicjais? Un cimiteri di lâ dopo, a regonâi vuessams e la clapàrie? O sai ch'ò veis par statût di no fâ pulitiche. E chê di judâ a sassinâ un popul, ce non j darèssiso?

Cence nissune stime.

Treli, ai 16 di novenbar dal 1979

pre Antoni Beline
mestri e predi